

मार्निंग डोगरी न्यूज़ बुलेटिन,

समा. 09.20 Hrs

<><><><><><><><><><><><>

## Headlines

1. उपराज्यपाल मनोज सिन्हा होरें अध्यात्मकमता गी बढ़ावा देने च श्री माता वैष्णो देवी श्राईन बोर्ड दी सराहना कीती-बोर्ड दा पंचांग कलेंडर ते डायरी जारी कीती।
2. खुराक- उपभोक्ता मामले ते सार्वजनिक बंड बिक्री मंत्री सतीश शर्मा होरें एफ.सी.आई. दे गोदामें दा चानचक्क दौरा लाया- अन्नदानें दे मयार ते ढंगै सिर रख-रखाव पर जोर दिता।
3. पुंछ जिले च बन्ने पारा थमां होइयै गतिविधियां चलाने आहले इक आतंकी सरगना दी सम्पत्ति जब्त कीती गई ऐ।
4. कठुआ जिले च पुलस ते एन.एस.जी. कमांडोएं आतंकी चुनौतियें कन्नै निबड़ने दा भ्यास कीता।
5. भद्रवाह च बर्फबारी दे बाद जम्मू प्रांतै च स्यालु सैलसफा च बी तेजी दिक्खने गी लब्बै करदी ऐ।

<><><><><><><>

## LG SMVD Calender

उपराज्यपाल मनोज सिन्हा होरें कल लोक भवन जम्मू च श्री माता वैष्णो देवी श्राईन बोर्ड दी अधिकारिक डायरी ते 2026 बरे दा पचांग कलेंडर जारी कीता। बड़डे पुज्जे दे संतें ते विद्वानें आसेया त्यार कीती जाने आहले पंचांग कलेंडर च प्रमुख तिथे- धेरारें ते होरनें धार्मिक ध्याड़ें

बारे जानकारी दिती दी होंदी ऐ। इस मौके एल.जी हों श्री माता वैष्णो देवी श्राईन बोर्ड दी आध्यात्मिक परम्पराएं गी जींदा ते बरकरार रखने दे कन्नो-कन्नी आधुनिक प्रयोग ते शरदालुएं दियें जरूरतें साबबै कम्म करने लेई- मती सराहना कीती। इस मौके उनें बोर्ड आसेया रम्भी गेदियें किश पैहलकदमियें दा बी चेचे तौरा पर जिक्र कीता- जिंदे च मुफ्त लंगर सेवा- स्वच्छता अभियान- रियासी जिले च 5 मंदिरें दे समर्पण ते हरित त्रिकुटा पहाड़ी श्रृंखला अभियान बी शामिल न।

<><><><><><>

### Satish Godowns Inspection

खुराक- सार्वजनिक बंड बिक्री ते उपभोक्ता मामले दे मंत्री सतीश शर्मा हों कल जम्मू च भारतीय खाद्य निगम-एफ.सी.आई. दे गोदामें दा चानचक्क दौरा लाया ते उत्थे अन्नदानें दी दस्तेयाबी- मयार ते जमा करियें रखने दी स्थिति दी निरीक्षण कीता। दौरे दौरान मंत्री हों एफ.सी.आई दे बक्ख-बक्ख शैड्डें दा दौरा कीता ते उत्थे उपभोक्ताएं च बंडने लेई रखी गेदियें बोरियें दी स्थिति-रकार्ड रखने- अन्नदानें दे मयार ते बंड बिक्री दे तौर तरीकें बारे जानकारी हासल कीती। इस दौरान उनें सरबन्धित अधिकारियें गी निर्देश दिता जे मयार दे साबबै अनाज गी बक्खरा-बक्खरा करियें रखेया जा ते उपभोक्ताएं लेई सप्लाई होने आहले राशन दे मयार कन्नै कोई समझौता नेई कीता जाना लोड़चदा। मंत्री हों उपभोक्ताएं दे हितें दी राखी ते खाद्य सुरक्षा गी लेइयें सरकार दी वचनबद्धता गी बी पक्का कीता।

<><><><><><>

### Digital Crop Survey

कृषि उत्पादन ते करसान कल्याण निदेशालय नै केन्द्री मंत्रालय दे सैहयोग कन्नै कल जम्मू च डिजिटल फसल सर्वेक्षण बारे डिवीजनल स्तर दी सिखलाई दी शुरुआत कीती। 21 जनवरी तगर चलने आहले इस कार्यक्रम दा मकसद ऐ जे जम्मू खिते दे सब्बन जिलें दे अफसर खेतरीय सतह दी फसल सरबन्धी आंकड़ें गी सेही तरीके कन्नै किट्ठा करना यकीनी बनाई सकन। राई-बाई मैहकमे दे निदेशक अनिल गुप्ता होरें बेहतर योजना- पारदर्शिता ते करसान केन्द्रित स्कीमें च डिजिटल तकनीक दी भूमिका पर लोs पाई।

<><><><><><>

Rana Legislators

जंगलोत ते जलशक्ति मंत्री जावेद अहमद राणा होरें कल केई विधायकें ते लोकें दे शिष्टमंडलें कन्नै मलाटी दौरान अपने मैहकमें सरबन्धी बक्ख-बक्ख मुद्दें बारे गल्लबात कीती। मलाटियें दौरान पुट्टे गेदे मसलें च पी.एच.ई- सिंचाई- हाड़ें दी रोकथाम ते जनजातीय मामले सरबन्धि केई मुद्दें पुट्टे गे। एहदे इलावा पानी सप्लाई- सिंचाई- हाड़ प्रबंधन- जनजातीय मामले- इमारती लकड़ी दी सप्लाई ते जम्मू-कश्मीर जंगलात विकास निगम दे मलाजमें सरबन्धि मुद्दें पर बी तफसीली गल्लबात होई। मंत्री होरें सब्बन दियें मंगें गी धरोड़यै सुनेया ते उन्दे पैहल दी बिनाह पर नबेड़े दा भरोसा दोआया।

<><><><><><>

राजौरी जिले च कब्जा रेखा कन्नै लगदे ग्रांs केरी च कम्युनिटी रेडियो स्टेशन रेडियो संगम दे औपचारिक उद्घाटन मगरा एह जमीनी सतह पर दूर संचार ते नागरिक सैन्य सहयोग गी तगड़ा करने च इक्क महत्वैअ आहला मील दा पत्थर साबत होग। रेडियो संगम दा उद्घाटन राजौरी दे डी.सी अभिशेक शर्मा होरें कीता, जेड़े इस मौके बतौर मुख परौहने उत्थें मौजूद हे। अपने संबोधन च उपायुक्त होरें जमीनी सतह पर संचार गी मजबूत करने, मकामी संस्कृति गी बचाने ते समावेशी विकास गी बढ़ावा देने च कम्युनिटी रेडियो दी महत्वै आहली भूमिका पर लोs पाई।

<><><><><><>

#### Poonch Property Handler

जम्मू-कश्मीर पुलसै कल पुंछ जिले दी मंडी तहसील च पाकिस्तान च रेहियै गतिविधियां चला रदे आतंकवादियें दे इक सरगनाह दी अचल सम्पत्ति जब्त कीती ऐ। अदालत दे निर्देशों दी पालमा करदे होई 6 कनाल ते साइडे 13 मरले च बनी दी इस सम्पत्ति दी कीमत अंदाजन कोई 13 लक्ख 36 जहार दस्सी जा रदी ऐ। एह सम्पत्ति पुंछ दे चम्बर कनारी ग्रां दे बसनीक सुलतान लोन दे पुतर जमाल लोन उर्फ जमाला दी ऐ- जेहड़ा बन्ने पार उंठी गेदा ऐ ते उत्थुआं ऐसी गतिविधियां चला करदा ऐ जेहड़ियां राष्ट्रीय सुरक्षा लेई खतरा न। ओहदे उपरोतली कनूनी प्रक्रिया कोला बचदे रौहने कारण अदालतै उसी फरार अपराधी घोषत करी दिते दा ऐ।

<><><><><><>

#### Anti –Fidayeen Mock Drill

जम्मू-कश्मीर पुलस ते राश्ट्रीय सुरक्षा गार्ड NSG दे कमांडोए कल कठुआ जिले च फिदायीन रोधी ते बंधक रोधी मॉक ड्रिल यानी झूठे-मूठे दा भ्यास कीता गया। कुसै बी चाल्ली दे आतंकी खतरे कन्नै निबड़ने दी तयारियें दे हिस्से दे तौरा पर एह भ्यास एस.एस.पी. कठुआ मोहिता शर्मा हुंदी दिक्ख-रिक्ख च हीरानगर ते राजबाग पुलस स्टेशने पर कीता गया- जेहदे च एस.ओ.जी मकामी पुलस ते एन.एस.जी नै हिस्सा लैता। एन.एस.जी दे कमांडोएं इस दौरान विस्फोटके गी नकारा करने-आतंकी हमले गी नकाम करने- आतंकिये दा सफाया करने ते जेकर लोके गी बधक बनाए गेदा होए तां ओल्लै किस चाल्ली कारवाई करिये उनेंगी बचाना ऐ- एहदा प्रदर्शन कीता।

<><><><><><>

## Ring Road Plots

जम्मू विकास प्राधिकरण (JDA) नै कल जम्मू दे कोट भलवाल हाउसिंग कालोनी च रिंग रोड परियोजना कन्नै प्रभावित प्लॉट दे बदले 22 वैकल्पिक प्लॉट दी अलॉटमेंट आस्तै लाटरी सिस्टम राएं आवंटन कीता। जे.डी.ए परिसर च लोआए गेदे इस कार्यक्रम गी आवंटिएं ते अधिकारिये दी मौजूदगी च पारदर्शी तरीके कन्नै सम्पन्न कीता गया। एह पैहलकदमी इक दहाके शा मते समे थमां बकाया पेदे मुद्दे गी हल करने दी दिशा च इक बड्डी गेंs ऐ- जेहदे कन्नै प्रभावत आवंटिये गी लम्मे चिरै थमां बलगने परैन्त राहत थोग।

<><><><><><>

जम्मू च बी स्यालु सैलसफा च बल्लें-बल्लें तेजी दिक्खने गी लब्बै करदी ऐ ते मुल्खै दे बक्ख-बक्ख हिस्सें थमां सैलानी खित्ते च बर्फू नै खटोए दे पहाड़ें च किश समा बिताने लेई मते जोश ते जज्बे कन्नै जम्मू प्रांतै दे पहाड़ी इलाके बक्खी आवा करदे न। भद्रवाह दे गुलडांडा इलाके च बर्फ पौने दे बाद जित्थे चौने बक्खी मन परचाने आहला नजारा बनी गेदा ऐ उत्थै गै सैलानियें दी आमद च बी चानचक्क बाद्दा दर्ज कीता जा रदा ऐ। इस बर्फबारी नै नां छड़ा सैलानियें गी आकर्षत कीता ऐ सगुआं मकामी सैलसफा ते आर्थिक गतिविधियें च बी तेजी आई ऐ।

<><><><><><>